

陶文毅公全集

陶文毅公全集卷十九目錄

奏疏 祀典 旌表

請將前明高攀龍從祀

文廟摺子

請將元沈壽三入祀忠義祠題本

請將前明許文瑾等入祀忠義祠題本

請將前明朱儀等入祀忠義各祠題本

請將前明馬應魁等入祀忠義祠題本

武進陽湖紳士查出未經

旌表之貞孝節烈婦女三千一十八口請建總祠致祭

題本

奏疏 視典 旌表

請將前明高攀龍從祀

文廟摺子

奏爲請增

文廟從祀儒臣以崇正學仰祈

聖鑒事竊惟致治必資懋學繼往卽以開來

孔聖之道師表萬世而歷代端粹之儒亦得從祀

廟庭俾廣心傳典至重也茲據蘇州藩司賀長齡會同

臬司覺羅慶善詳據常州府無錫金匱兩縣紳士

秦大治華端翼陶沅廉志勲等呈稱明故都察院

左都御史謚忠憲高攀龍承晦庵之主敬師伊川
之存心以險阻艱難爲體認身心之地其境愈難
其學彌粹凡德業進修之地友朋麗澤之功見於
所著三時困學諸記語錄會講等書操履涵養粹
然一出於正死生榮辱確乎不動於中實爲理學
之宗宜列先儒之祀伏乞詳題從祀

文廟等情由該府縣學取造事實冊結詳司核轉請

奏前來伏查

欽定明史儒林傳序言正嘉以後篤信程朱不遷異說高

攀龍其卓卓者又

御批歷代通鑑輯覽注載攀龍學本濂洛操履篤實涵養
邃密粹然爲一代大儒又

欽定四庫全書總目載高子遺書十二卷其學以格物爲
先講學語類多切近篤實闡發周密立朝大節不
愧古人等語又查劉宗周文集稱古有朱子今有
忠憲黃宗義謂海內以高劉並推大儒可無遺議
陸隴其亦謂古今有成德之師有興起之師成德
之師砥礪磨礱造人材於粹精之地程朱是也興
起之師廉頑立懦拔人心於陷溺之中高劉是也
是皆以攀龍與宗周並稱比諸程朱考其生平持

身則主敬存誠立朝則直言正色卒能取義成仁
不負所志其立說著書授徒講學皆宗經衛道足
以模楷儒林恭逢我

國家昌明正學崇勵真儒明臣如劉宗周已荷

特旨從祀呂坤黃道周亦皆次第表彰仰邀

俞列兩廡高攀龍忠節既樹人倫之鵠道德尤爲後學

之宗似宜增入從祀以勵真修而端儒術除將送

到事實冊結咨送部科外謹會同兩江總督

臣琦

善江蘇學政

原

辛從益合詞恭摺具

奏伏乞

皇上聖鑒

敕部議覆施行謹

奏

道光六年五月二十七日奉到

硃批禮部議奏欽此

請將元沈壽三入祀忠義祠題本

題爲遵例查詳以彰忠義事據安徽布政使司布政使徐承恩詳稱據廣德州知州景文詳稱據生員韋文煥等呈稱查得圩鋪保沈上青等之祖沈壽三生於元季壯歲從軍集慶路屢破寇盜有功經御史大夫福壽薦爲行軍千戶元至正十六年明兵克金陵壽三率長子宏次子度血戰俱亡於宮水旁妻王氏聞信亦卽奔赴屍所自盡圩鋪方蜀兩保立廟以祀屢昭靈顯實係忠義捐軀懇請詳題以彰名節等情並據前任甘肅平羅縣知縣沈上

青同生員沈肇華監生沈思泰民人沈于周等開
呈伊族祖沈壽三行實原文出具切實甘結呈送
譜牒前來查所呈事實內開壽三原名良佐字太
初從軍後易名壽三時南臺御史大夫福壽守集
慶路壽三投軍常率兵破羣盜有功後有巨寇犯
關壽三又率兵拒之大捷御史卽薦爲行軍千戶
至正十六年三月二十四日明兵破集慶路壽三
率其長子宏次子度戰死於宮水旁妻王氏聞之
亦至宮水旁自盡時有吳嗣昌知其屍收歸骸骨
家人合葬於茂祖墳山夫婦父子同穴壽三生於

元武宗至大元年戊申九月初八日巳時卒於元
順帝至正十六年丙申三月二十四日酉時配王
氏生於元武宗至大元年戊申五月十四日未時
卒於元順帝至正十六年丙申三月二十四日酉
時長子宏生於元順帝元統元年癸酉六月十三
日子時卒於元至正十六年丙申三月二十四日
酉時次子度生於元順帝至元元年乙亥四月二
十九日午時卒於元順帝至正十六年三月二十
四日酉時等情查核沈姓宗譜所載相同并據廣
德州學正陸泰增訓導潘達南申稱據生員韋文

煥等呈報元臣行軍千戶沈壽三父子捐軀盡難
等情檢查事實確加諮訪無異核看得元故行軍
千戶沈壽三生本儁英仕當衰季効命早期於壯
歲從軍克振其戎容四口全歸共積石城之怨一
門巷戰難招烈士之魂在至正之年固莫下旌忠
之命卽前明之世亦未褒勝國之賢尙書推咸秩
無文禮經重以死勤事揆諸祀典宜廣

皇恩相應將呈到事實開造冊結詳請核轉等情據此
該廣德州知州景文核看得元故行軍千戶沈壽
三父子捐軀盡難一案沈壽三弱冠從軍秉性忠

烈官授行軍千戶勇敢有爲屢破寇盜有功洵爲
干城之寄迨順帝至正十六年三月二十四日明
兵克集慶路御史大夫福壽殉節千戶沈壽三與
子宏度巷戰死於宮水旁其妻王氏聞之亦自盡
竊照浩然正氣立千古之綱常憫矣孤忠乃一生
之烈節父子捐軀未遂英賢夙志全家被難方爲
忠節雙全帥府從戎不意適遭陽九鄉邦捍禦乃
能疊著神靈碧血丹心同河山而并永忠肝義膽
偕日月以齊光闡發幽芳藉鄉評而允協表揚忠
盡訪輿論以僉孚在昔完全大節取義成仁於今

得邀

曠典垂名青史既據該紳耆等公稟出具切結并該學
具詳前來理合造具事實清冊加具印結詳送核
轉等情到司該安徽布政使司布政使徐承恩核
看得廣德州元故行軍千戶沈壽三同妻王氏及
長子宏次子度遇難死事捐軀盡節一案維沈壽
三氣壯從軍志堅禦侮當有元之末造守集慶之
偏隅器本干城僅作千夫之長勇雖拔幟忽當大
敵之臨縱短戰之相交奈守陴之力竭軍容如墨
捐軀莫濟當關汗血成渠畢命於茲報國於是于

從父死妻殉夫亡勵君臣父子之大經全孝弟忠
貞之峻節惟時當兵燹史乘致闕夫表揚念世著
精誠粉榆尙資其護佑今荷

恩綸採訪

聖澤汪洋稽以死勤事之文

褒嘉應及符有功于民之典饗祀宜隆查禮部則例內
載一凡忠義孝弟之士題請

旌表直省府州縣衛各建設忠義孝弟祠一祠內立石
碑題名其上身後設位祠中春秋祭祀又載遇難
死事之臣曾入昭忠祠者仍准於本邑忠義孝弟

祠內設位致祭無庸建坊又例載遭寇殉難紳士庶民令該督撫轉飭該地方官於本邑忠義孝弟祠內設位致祭并題名於石碑俾得留傳永久又例載凡婦女遭寇守節致死雖事歷年久該地方官查核確實准補行題請

旌表有親屬者令地方官給銀三十兩聽其自行建坊節孝祠內設位致祭各等因遵奉在案今廣德州已故元行軍千戶沈壽三同長子宏次子度捐軀殉難忠烈可嘉核與崇祀本邑忠義孝弟祠之例相符其沈壽三之妻王氏聞信亦卽奔赴屍所捐

軀殉烈宜沐

旌揚旣據該州并學查明宗譜行實輿論僉符取造事實冊結詳送前來相應加看轉詳鑒核具

題以闡幽光等情轉詳到

臣該

臣看得廣德州元故

行軍千戶沈壽三同妻王氏及長子宏次子度殉難捐軀一案沈壽三偏裨受職卻殺雖僅佐中軍慷慨從戎孝德實能摧強寇蒼鵞已兆真人來濠上之師流水鳴哀主將殉南臺之節大厦之一木難支猶撐勁骨狹巷之短兵相接豈戀餘生狼曠正獲其死所之時解揚克遂其致命之願且名駒

盡喪均以孝於親者忠於君寡鵠堪悲亦以殉其
夫者報其國靈存雙廟蹟比張巡烈萃一門事同
余闕雖紅羊換劫前代未題竹帛之名而碧血成
燐至今猶護粉榆之社宜荷

旌揚之鉅典俾邀俎豆之榮光查例載忠義孝弟之士
題請

旌表直省府州縣衛各建設忠義孝弟祠一祠內立石
碑題名其上身後設位祠中春秋祭祀又載遇難
死事之臣曾入昭忠祠者仍准於本邑忠義孝弟
祠內設位致祭毋庸建坊又載遭寇殉難紳士庶

民令該督撫轉飭該地方官於本邑忠義孝弟祠
內設位致祭并題名於石碑俾得留傳永久又例
載凡婦女遭寇守節致死雖事歷年久該地方官
查核確實准補行題請

旌表有親屬者令地方官給銀三十兩聽其自行建坊
節孝祠內設位致祭各等因茲查元故行軍千戶
沈壽三并其長子沈宏次子沈度捐軀殉難忠烈
可嘉核與

題請入祀忠義祠之例相符其沈壽三之妻王氏聞
信亦卽奔赴屍所自盡洵屬節烈堪嘉應請

旌表給銀建坊於節孝祠內設位致祭除冊結送部查

核外

臣謹會同協辦大學士兩江總督

臣孫玉庭

安徽學政

臣

徐頤合詞具

題伏乞

皇上聖鑒敕部議覆施行爲此具本謹題請

旨

道光三年十一月十八日奉

旨依議欽此

請將前明許文瑾等入祀忠義祠題本

題爲遵例詳請以彰忠義事查接管卷內

臣

於藩司

任內具詳據徽州府程懷璟詳據祁門縣知縣張
進南詳稱准儒學教諭錢師康訓導吳賀繪牒稱
據進士鄭繩祖等呈爲遵諭呈明叩恩詳請以彰
忠義以勵風教事竊惟人道以綱常爲重祀典以
忠孝爲先是以烈士捐生獲邀榮於異代

聖朝釐典必褒卹乎前朝况乎顏氏弟兄標節義於千
載卞家父子萃忠孝於一門斯固古今所罕觀而
爲

聖代所必嘉者也伏見本邑前明太學生許文瑾郡庠
生許文玠簪纓世胄詩禮名宗孝友著於家庭忠
義根乎天性戎韜素習百萬羅胸弓馬夙嫻千人
辟易乃者明祚將終寇氛橫熾烽煙蔽日爭逐鹿
於中原篝火飛沙肆鳴狐於徧野維茲下邑葭爾
孤城民無環胄之威地乏守關之險時有流寇數
百人假勤王之號如虺如蛇逞掠野之兇爲梟爲
獍二公心存保障寄任千城築百雉以登陴募千
人而制挺破黃巾於伏莽殲厥渠魁縱赤壁之火
攻焚其巢窟此其義聲馳於六合勇畧冠乎三軍

已足俎豆粉榆馨香奕禩者矣及乎軒弓遽逝殷
鼎忽遷羣公有靈武之謀少帝無瑯琊之畧君臣
荒佚藩鎮騷維時我

朝應

大起運靖逆安民元牡陳壇赤烏流屋天戈南指八州盡
入乎版圖露布呈馳五等同歸乎璽綬然而姬宗
受命西山有孤竹之薇漢室開基東海有田橫之
島雖跼犬昧尊堯之義實哀鵠同望帝之心時則
我郡有金正希名聲者糾鄉旅以團兵抗

王師而逆命揭竿斬木計出倉皇哀雁嗥猿悲成慷慨爰

以二許公功高銅馬會迅掃乎鯨鯢望重長城請
運籌於幃幄二公手持尺劍身入孤營旌旗見牙
纛之威號令肅銀刀之隊三郊三遂張南北之兩
軍一弟一兄分左右之二拒我

朝於是麾白旄而陳野呼蒼兕以渡河指揮而林壑震
驚叱咤則川源駭盪藐爾彈丸之地頓失雄關猝
然新合之兵豈當勁旅於是文瑾明知回天無力
遂乃止水爲心誓效死以當鋒爰分軍爲犄角棠
君別弟灑淚分帟周處絕援褰瘡入陣未幾果與
金聲先後被執並解金陵南八臨刑張巡呼爲男

子甄生受刃元稹嘆爲布衣於時文玠軍挫池陽
身犇閩越文信國之扁舟航海無處求生蔡子英
之單騎出關忽焉流涕崎嶇險阻收一旅之遺兵
感憤暗鳴作三軍之勇氣而零星殘卒莫禦龍驤
四壁楚歌空悲騅逝浩亭一戰先亡諸葛之兒石
頭千年尙識袁公之子蓋其長子生佳戰死於陣
而文玠亦散軍受縛矣嗟乎匡山莫返已非宋室
之山河廣武相持徒苦江東之子弟文玠以爲

天命有歸尙弊蒼生於百戰曷若臣心已竭獨留碧血於
千秋此則植節盡倫旣不渝乎金石成仁取義更

無愧於聖賢者也今者

帝網恢張

天閭眈蕩屬勝朝之孤孽有善必褒凡薄海之幽潛無
微不闡是以我郡之金太史曾邀

賜諡之榮而本邑之馬孝廉復被

旌忠之典繩祖等夙欽大節素重鄉評爲此確查開陳
事實粘結呈請申詳崇祀忠義庶使節義一門增
蘿石山川之色烝嘗百代勵古今臣子之心闔邑
幸甚等情據此該儒學教諭錢師康訓導吳賀繪
覆查無異會看得前明太學生許文瑾郡庠生許

文玠忠謀釐稷義炳日星值國政之不綱慮兵氛
之告警應募則千夫聽命任寄千城守陴而百堵
防奸功資保障於時

天戈震電海鏡澄波率土臣民寰區已臻乎大定偏隅孤
孽小草自效其愚忠邀結外援拒

王師而逆命奔馳堅壁率義旅以圖功卒之螳臂空張雉
垣莫守兄則金陵就戮甘殉難以捐軀弟又閩越
奔亡竟散軍而受縛綜其節概並爲一代之完人
樹厥綱常不愧千秋之大義允宜邀

旌忠之鉅典荷

賜祀之殊榮爲此遵例取造冊結加看請轉等因到縣
准此該祁門縣知縣張進南核看得前明太學生
許文瑾郡庠生許文玠性秉孤忠心如鐵石當兵
氛之告警任捍衛於一身授衆登陴遠近於焉待
命折衝禦侮鄉里賴以甯安跡其抗拒

王師要亦無改貞操兄旣金陵就戮弟亦閩越捐軀雖紓
難守眞志乘未詳其事實而舍生取義心跡實協
夫輿情似宜仰沐

皇恩崇祀忠義茲准儒學牒報前來卑職覆核無異理
合加結具文詳請核轉等情到府據此該徽州府

知府程懷璟核看得祁門縣前明太學生許文瑾
郡庠生許文玠身列文垣胸羅武庫值國維之政
墮願效蟻忱迨

天旅之威臨猶當螳臂兄旣金陵就戮弟亦閩嶠捐軀竭
草莽之孤忠無虧臣節凜綱常之大義克樹人倫
宜沐

皇恩聿昭祀典茲據該縣准學牒送冊結前來覆核無
異理合加看詳送核轉等情到司據此

臣

於藩司

任內核看得祁門縣前明太學生許文瑾郡庠生
許文玠韜畧羅胸忠忱貫日生民政失綱之日處

賊氛不靖之區環甲一呼伏莽免乘墉之厄麾軍
再戰居民咸安堵之形迄乎

天命有歸

王師無敵螳奮當車之臂慷慨與戎魚成入釜之哀後先
殞命而文玠長子許生佳者戰死行間克從父志
凜綱常於千古萃忠孝於一門跡其抗拒我行雖
昧吠堯之見律以各忠所事實同望帝之忱洵係
孤忠允符

祀典伏查禮部例載遇難死事之臣曾入昭忠祠者
仍准於本邑忠義孝弟祠內設位致祭毋庸建坊

又查例載凡殉難紳士庶民令該督撫轉飭地方官於本邑忠義孝弟祠內設位致祭並題名于石碑俾得留傳永久又查乾隆四十年十一月初十日欽奉

上諭賜諡明末殉節諸臣原案恭讀

諭旨內載或死守城池或身殞行陣與夫俘擒駢僇視死如歸者爾時王旅徂征自不得不申法令以明順逆而事後平情而論若而人者皆無愧於疾風勁草卽自盡以全名節其心亦并可矜憐又載而諸人茹苦相從舍生取義各能忠於所事亦豈可令其湮沒不彰自宜稽

考史書一體旌謚其或諸生韋布及不知姓名之流並能慷慨輕生者議謚固難於概見亦當令俎豆其鄉以昭軫慰等因欽遵在案今祁門縣前明殉難之太學生許文瑾郡庠生許文玠與明季左僉都御史休寧金聲同時抗拒

王師於順治年間先後俱在金陵就戮盡忠檢查庫貯歷代通鑑輯覽金聲已於乾隆四十年邀

恩賜謚而許文瑾等乃諸生韋布當時不無漏報以致湮沒未彰現據該府縣學詳請崇祀到司因事隔多年旋即弔查切實證據並志書核辦行據祁門縣

詳覆業經進士鄭繩祖等呈明縣志修自康熙年間凡禦敵流賊者自可載及若抗我顏行彼時方指爲擒俘逆犯孰敢大書特書志其不朽是以府縣志書未經載入迨至

高宗純皇帝擴天地爲公之量凡明季臣僚俘擒不屈而能殉節者念其各忠所事曲加崇獎自此許氏紀述始行刊傳各等語尙屬實在情形並據該地方官查有先年名士陳二典所撰贈言紀畧可徵又有許文玠家屬變產入官之印收爲據檢齊呈驗前來是其盡忠事蹟已屬確鑿無疑旣經該府縣

學查明取造冊結由縣加粘印結鈔錄明臣

賜諡原案詳請崇祀本邑忠義祠核其事例相符至郡庠
生許文玠事實冊造該生長子許生佳年十八歲
戰死於陣亦有紀述可證現據該縣學聲稱許生
佳身殞行陣亦與入祠之例相符並請附祀以彰
忠義等情似可共沐

皇恩俾昭軫慰相應將送到冊結加看轉詳鑒核具

題以闡幽光等情轉詳到前撫臣孫爾準因調任福

建巡撫卸事未及核

題移交到

臣該臣

看得祁門縣前明太學生許文瑾

郡庠生許文玠幼讀儒書兼通武略遭逢國難手
無執戟之權捍衛鄉關力掃乘墉之寇募千人爲
隊伍作下邑之干城迄乎殷社已墟

天戈底定遂乃軍分犄角敢抗顏行迄乎繫絕苞桑猶鳴
孤掌涪亭飲血幸諸葛之有兒鍾阜就擒哀棠君
之別弟爲君爲父忠孝一門難弟難兄綱常萬古
雖蹈犬豕尊堯之見無道則愚而精衛有填海之
心舍生取義久協

旌忠之例宜邀

賜祀之榮查例載忠義孝弟之士題請

陶文毅公全集

卷十九

奏疏

七

旌表直省府州縣衛各建設忠義孝弟祠祠內立石碑
題名其上身後設位祠中春秋祭祀又載遇難死
事之臣曾入昭忠祠者仍准於本邑忠義孝弟祠
內設位致祭毋庸建坊又例載凡殉難紳士庶民
令該督撫轉飭該地方官於本邑忠義孝弟祠內
設位致祭並題名於石碑俾得留傳永久各等因
所有祁門縣前明太學生許文瑾郡庠生許文玠
及文玠之長子許生佳等捐軀殉難節烈可嘉核
與

題請入祀忠義祠之例相符經臣於藩司任內查明

取造事實冊結具詳前撫臣孫爾準因調任福建

巡撫卸事未及核

題移交到臣確加覆核無異除冊結送部查核外臣

謹會同協辦大學士兩江總督臣孫玉庭安徽學

政臣徐頤合詞具

題伏乞

皇上聖鑒敕部議覆施行爲此具本謹題請

旨

道光三年七月二十七日奉

旨依議欽此

請將前明朱儀等入祀忠義各祠題本

題爲一門忠烈詳請入祠事據安徽布政使司布政使徐承恩詳稱據寧國府知府郭承恩詳據涇縣知縣陶登瀛詳稱准儒學教諭史炳訓導汪道平牒稱據翰林院編修吳敬恒刑部主事翟發宗等呈稱查得明故四川嘉定州知州朱儀崇禎庚辰特用榜進士出守嘉定州課最行取將次入都會流賊張獻忠寇蜀儀登陴固守旣而賊兵分陷郡縣嘉定被圍勢窮力竭儀謂其子命錫曰人生大節無過君親今時勢孔棘豈可屈於不義命錫唯

唯承教儀妻胡氏奮然曰丈夫死忠妾獨不能死
節乎遂以金簪刺喉昏仆復甦又自以指抉創須
臾命絕儀朝服北向再拜命外舉火與子命錫及
胡氏之尸同時俱毀事詳嘉定府及寧國府涇縣
諸志竊思朱儀當寇兵猝警不因報最以棄其民
及城郭云危尙援大義以訓厥子滿腔熱血竟殞
命於杆營一寸丹心幾同埋於灰燼此允合

盛世褒嘉之典應請入忠義祠者也至於儀妻胡氏德
秉坤貞心同日儼遇寇而先夫殉難允推巾幗所
難能臨危而爲國捐軀實屬艱貞之奇節儀子命

錫年方及冠志已獨堅承父命而移孝作忠旣不
愧箕裘肖子遇國難而舍生取義更無忝忠蓋完
人此又均合

熙朝旌恤之條應分祀節孝忠義各祠者也爲此鈔粘
嘉定府志并寧國府涇縣二志所載朱儀夫婦及
子命錫各事實加具族隣各結伏乞詳請分入各
祠俾得仰荷

皇恩而下安毅魄感切上呈等情到學據此該儒學教
諭史炳訓導汪道平會查得前明四川嘉定州知
州朱儀制科特選邊徼分符值蛾賊之環攻奈虬

援之外絕孤城効死盡室捐生齒齧成灰毅魄遠
追夫魯郡血藏化碧英靈近接於資中千古蓋臣
於茲爲烈儀妻胡氏身先夫死禍同慘於磨笄志
憤國仇節比堅於化石視清風嶺爲尤峻信彤史
氏所當書儀子命錫以終軍棄繻之歲有胡威問
絹之風倉猝趨庭從容赴火能執戈以衛社稷童
汪疇且欲勿殤甘并命以報君親卞忠貞可云有
子應照例請

旌入祀忠義之祠其妻胡氏及子命錫亦宜一體邀
恩分入節孝忠義各祠以廣

皇恩而飭倫紀茲據該族隣等開具事實切結公額前來覆查無異合行加看造具冊結送轉等情到縣准此該涇縣知縣陶登瀛核看得前明四川嘉定州知州朱儀丹山馳譽赤縣分符值蟻衆之憑凌慨螳封之欲陷書生未能平賊心只懷丹將軍惟解斷頭血都化碧登陴善衆難回東郭之烽闔戶捐軀同赴昆陽之火况乎磨笄矢烈陸夫人地下相從荷戟偕亡卞公子關中殉難忠孝傳爲繼述節義著於唱隨載稽志乘之褒揚宜受

盛朝之

旌祀茲准儒學移送事實冊結前來覆查無異理合加
看加結詳送核轉等情到府據此該寧國府知府
郭承恩核看得涇縣前明四川嘉定州知州朱儀
少登黃甲壯綰邊符教養有方士民愛戴已政行
之報最值流寇之頻臨爲國捐軀忠誠貫日正衣
冠而赴火慷慨捐生囑妻子以相從從容就義儀
妻胡氏磨笄矢烈先夫隕身儀子命錫堅志偕亡
同父殉難忠孝節烈萃於一門允垂志乘之光宜

沐

旌揚之典理合加看同送到各冊結具詳核轉等情到

司據此該安徽布政使司布政使徐承恩核看得
涇縣前明四川嘉定州知州朱儀義重綱常志存
保障仕明祚衰微之日處寇氛橫熾之區蕞爾孤
城竭盡當關之力彈丸邊境悲無掣肘之威蹈烈
火而焚身孤忠獨矢勵義方以勗子毅節相承其
子朱命錫同捐軀於煨燼視死如歸凜庭訓於倉
皇克從父志斯旣父忠子孝抑且夫唱婦隨儀妻
胡氏一聞死難之言先刺喉而殞命夙凜從夫之
義甘矢節以殉身千古芳徽炳垂志傳一門忠孝
光耀寰區宜荷

恩綸聿昭祀典伏查禮部明例內載遇難死事之臣曾
入昭忠祠者仍准於本邑忠義孝弟祠內設位致
祭毋庸建坊又例載遭寇殉難紳士庶民令該督
撫轉飭該地方官於本邑忠義孝弟祠內設位致
祭並題名於石碑俾得留傳永久等因又例載婦
女遭寇守節致死雖事歷年久該地方官查核確
實准補行題請

旌表有親屬者令地方官給銀三十兩聽其自行建坊
如無親屬卽令地方官於該氏墓前建坊節孝祠
內設位致祭各等因遵奉在案茲涇縣前明四川

嘉定州知州朱儀遭張獻忠寇川城陷固守不屈
同子朱命錫自焚而死均屬忠節可嘉現據該府
縣學查明郡邑志書所載事蹟詳請崇祀本邑忠
義孝弟祠核與例案相符至朱儀之妻烈婦胡氏
從夫殉節亦與婦女遭寇致死准其

旌表之例相符并請

旌揚照例給銀建坊入祀節孝祠以彰潛德相應將送
到事實各冊結轉詳鑒核具

題等情轉詳到

臣該臣

看得涇縣前明四川嘉定州

知州朱儀志篤忠誠家傳孝義值蟻賊鳴張之會

正鸞叢瓦解之時登陴力竭難揮落日之戈報國
心堅甘燼然岡之玉其妻胡氏先時絕吭貞心更
礪於磨笄其子命錫相繼焚身肖子克成於蹈火
當日成仁取義早具魯公奮爪之心今茲發隱閭
微彌昭卞氏全家之烈允符成例宜荷

旌揚查例載忠義孝弟之士題請

旌表直省府州縣衛各建設忠義孝弟祠一祠內立石
碑題名其上身後設位祠中春秋祭祀又載遇難
死事之臣曾入昭忠祠者仍准於本邑忠義孝弟
祠內設位致祭毋庸建坊又載遭寇殉難紳士庶

民令該督撫轉飭該地方官於本邑忠義孝弟祠內設位致祭並題名於石碑俾得留傳永久又例載凡婦女遭寇守節致死雖事厯年久該地方官查核確實准補行題請

旌表有親屬者令地方官給銀三十兩聽其自行建坊如無親屬卽令地方官於該氏墓前建坊節孝祠內設位致祭各等因茲查涇縣前明四川嘉定州知州朱儀遭張獻忠寇川城陷固守不屈同子朱命錫自焚而死均屬忠節可嘉核與

題請入祀忠義祠之例相符至朱儀之妻烈婦胡氏

從夫殉節亦與婦女遭寇致死准其

旌表之例相符應請

旌表給銀建坊於節孝祠內設位致祭除冊結送部查

核外

臣

謹會同協辦大學士兩江總督

臣

孫玉庭

合詞具

題伏乞

皇上聖鑒敕部議覆施行再照安徽學政

臣

徐頤因病

開缺所有印務係

臣

兼署毋庸會銜合併陳明爲

此具本謹題請

旨

道光四年四月十四日奉

旨依議欽此

陶文毅公全集

卷十九

奏疏

五

請將前明馬應魁等入祀忠義祠題本

題爲詳請崇祀入祠以彰忠義事據安徽布政使司
布政使徐承恩詳稱案於道光二年十二月三十
日奉准禮部咨儀制司案呈據安徽銅陵縣人戶
部七品京官何繼遵等爲呈請

旌表以慰忠魂而維風化事職等謹按明末貴池縣殉
節最著者五人除推官吳應箕已蒙

賜諡崇祀外有馬應魁汪思誠兩副將從前明閣部史可
法殉節揚州事詳明史并載

御批通鑑輯覽參將程宗熹亦殉節揚州事載池州郡志

又有桂王將曹大鎬殉節廣信亦載明史與

御批通鑑輯覽伏思此四人祀典久曠令名未加職等誼
其枌榆之社思揚蘅杜之芬爲此呈叩恩准請易
名之典定崇祀之文或兼配享閣部之祠或同祔
主鄉賢之座庶使神靈妥佑黍餘明德之馨且看
頑懦奮興草莽疾風之勁等情具呈前來查例載
凡遭寇殉難紳士庶民令該督撫轉飭各該地方
官於本邑忠義孝弟祠內設位致祭并題名於石
碑俾得留傳永久等語今據戶部七品京官何繼
遵等爲馬應魁等殉難呈請

旌表到部相應鈔錄原開節畧行文該撫查明該副將
馬應魁汪思誠參將程宗熹桂王將曹大鎬殉難
事蹟是否與該員等呈報相符如果屬實卽行取
具事實冊結送部仍由該撫照例具題到日再行
核辦可也等因咨院行司轉飭該府縣查明該員
等殉難事蹟詳題去後茲據署池州府知府劉湜
詳據貴池縣知縣漆日榛詳准儒學教諭馮秉桓
署訓導鄭昭牒稱儒童曹序賓等呈稱奉查身祖
曹大鎬殉節事實曾載明史及

御批通鑑輯覽池州郡志茲復謹將家乘所載事蹟逐一

呈明粘叩詳覆又據廩生汪龍翔等呈稱奉查前
明殉節汪思誠事蹟生等查得汪思誠無嫡派子
孫亦無祠譜家乘可考今於貴池縣志查取事蹟
粘懇鑒核轉詳又據民人程聖貴呈稱身八世伯
祖宗熹爲明閣部史可法麾下參將每戰有功尋
從可法殉節揚州事詳郡志應請鑒核又據儒童
馬逢恩等呈稱奉查身伯高祖馬應魁殉節事蹟
今謹鈔粘呈請鑒核申詳各等情到學并出具結
狀前來該儒學教諭馮秉桓署訓導鄭昭查看得
前明副將馬應魁志勵捐軀心存報國彫弧瞻落

收回士卒之心鐵甲芒寒灑徧將軍之血汪思誠
權謀自負義烈爲懷構奇計於蕭帷未甘市隱結
深恩於幕府肯獨生全參將程宗熹墨榜書名牙
璋作鎮新息侯從征有志已拚馬革還屍杞梁殖
載甲無功遂使城隅飲泣桂王將曹大鎬家風顏
閔志節夷齊血濺章江擬信國浩歌之日魂招秋
浦是鮑信歸葬之時凡茲忠烈遺模悉合

旌揚大典理合造具諸殉節事實清冊加具印結一併
移送到縣該貴池縣知縣漆日榛查看得前明副
將馬應魁汪思誠參將程宗熹桂王將曹大鎬類

皆胸藏韜畧氣奮風雲勇冠三軍忠義大書白甲
奇宗八陣智術早勵丹心梅嶺招魂死後還隨烈
婦章江得句生前久許完人雖在野在官託始各
殊事業而立功立德捐軀均屬忠貞迄今里巷稱
揚宜荷

朝廷旌獎茲准儒學牒送冊結前來理合加結詳送核
轉等情到府該署池州府知府劉湜查看得前明
副將馬應魁志篤忠貞氣誠果勇巡村射敵威倖
三箭天山戰巷捐軀香并一坏梅嶺副將汪思誠
書窺七畧胸有千秋帷幄參謀類束張巡之藥疆

場効命遂餐光弼之刀參將程宗熹會遭國難克
勵臣忱伏劍死綏不愧將軍之號投繯縊樹并傳
烈婦之名桂王將曹大鎬傳家孝友與國存亡急
難悲歌猶重鵲鴿之誼從容就義豈懷薇蕨之高
俱敦忠烈之風宜荷

旌揚之典茲據該縣遞看加結前來合將送到冊結詳
送核轉等情到司該安徽布政使徐承恩查看得
貴池縣前明副將馬應魁汪思誠參將程宗熹桂
王將曹大鎬心存忠義時際艱危或白甲從軍身
殲巷戰或丹誠決計血染輿尸或埋骨梅岡死節

有同心之婦或抗懷章水悲吟偕殉難之兄類皆
殺身成仁捐軀就義事蹟悉昭於志乘遺徽宜沐
夫

旌揚查例載殉難紳士庶民令該督撫轉飭該地方官
於本邑忠義孝弟祠內設位致祭並題名於石碑
俾得留傳永久各等語相應將送到冊結詳送核
題等情到臣該臣看得貴池縣前明副將馬應魁汪
思誠志切綱常曾懷義烈識將軍於部曲素具韜
鈴聽節制於元戎特鳴慷慨大旗日落獨堅授首
之心敝甲光寒猶耀精忠之字明參將程宗熹值

邢水之無援血灑梅岡洵無慙於科目桂王將曹
大鎬赴章門而就義詩懷棣萼更不愧於同心此
皆丹忱夙稟各遂臨危授命之心况俱青史堪徵
宜邀

聖代褒忠之典查例載殉難紳士庶民令該督撫轉飭
該地方官於本邑忠義孝弟祠內設位致祭并題
名於石碑俾得留傳永久各等語茲查前明副將
馬應魁汪思誠參將程宗熹桂王將曹大鎬俱捐
軀殉難節烈可嘉茲准禮部咨查當經飭查事蹟
去後今據該府縣學取造冊結前來核與

題請入祀忠義祠之例相符除冊結送部查核外

臣

謹會同協辦大學士兩江總督

臣

孫玉庭安徽學

政

臣

張麟合詞具

題伏乞

皇上聖鑒敕部議覆施行爲此具本謹題請

旨

道光四年閏七月十六日奉

旨依議欽此

武進陽湖紳士查出未經

旌表之貞孝節烈婦女三千一十八口請建總祠致祭

題本

題爲節孝久淹補請

旌表事據蘇州布政使賀長齡詳稱據常州府武進陽

湖兩縣紳士趙懷玉等赴撫院衙門呈稱嘉慶二

十五年欽奉

恩詔內載滿漢孝子順孫義夫節婦該管官細加訪確

造具事實奏聞禮部核定以憑旌表等因伏查武進

陽湖兩邑凡貞孝節烈婦女勵志冰霜既有年例

可憑又屬鄉閭共見其志最苦其守尤奇急宜先
加採訪爰於道光元年正月起廣爲搜採共計得
三千十八口其中或係子孫務農服賈不知

旌揚之典或係該婦女清操苦志不求褒獎之榮或後
嗣式微或鄉閭僻處以致數百十年來苦節久淹
查請

旌條例必取具里鄰親族人等切結及該節婦事實清
冊送部今該節婦等均係奇苦節行阨窮堪憫或
經諮訪族鄰異口同聲或已修入兩邑志書及潛
德錄內祇因爲數過多未敢按名請給坊銀可否

建立總坊將各節婦姓氏盡數鐫刻以垂永久伏
候裁示等情奉批蘇州布政司查明妥議通詳察
奪等因并據該紳士等止督學院衙門具呈均奉
批司確查例案詳辦當經前司廉敬行府節縣移
學訪查該節婦等均係飲冰茹蘗苦志彰聞洵大
節之無虧亦輿情之悉協卽據該紳士等呈請自
建總坊以垂不朽似屬可行造具各節婦姓氏清
冊由縣府覆核加看具詳到司經前司誠端核議
轉詳奉前任撫院張師誠以該節婦等均歷數百
十年該紳士等以苦節久淹欲求闡揚意屬可嘉

但建立總坊登載數千姓氏字跡細小易於漫滅
不如購屋數椽作爲節孝貞烈之祠設立扁額橫
牌刊刻姓氏得以益垂久遠亦足以慰幽魂而勵
風教如能捐貲購屋卽爲入

告飭再悉心妥議詳覆等因到司轉飭妥議詳辦去
後嗣據署武進縣知縣胡先達會同陽湖縣知縣
張世桐詳稱飭據該紳士等公同集議於郡中節
孝祠對面買地一區趕緊建造業已建屋三進繪
具祠圖呈請詣勘到縣當經會同履勘其屋俱高
深寬濶規模宏敞堪垂久遠等情具詳到司當經

覆核轉詳奉批再行妥議詳辦遵經轉飭核議去
後茲據武進縣知縣周鈞會同署陽湖縣知縣溫
綸湛詳稱會看得武陽兩邑貞孝節烈婦女三千
一十八口均係冰雪爲心松筠成性養生送死各
盡其誠守志撫孤備嘗其苦或捐軀以取義或殉
命以成仁雖事遠年湮尙有可憑之月旦而芳型
懿範宜無不發之幽光現經該紳士左輔等捐貲
建祠春秋致祭誠屬急公好義堪爲世道楷模相
應據情轉詳等情由府核議詳司據此伏查該節
婦等俱係青年矢志白首完貞允爲巾幗之型尙

乏馨香之薦今該紳士等憫其苦節表厥幽光捐貲建祠春秋致祭實屬善舉相應據情詳請具

題等情到

臣

據此該

臣

查得武進陽湖兩縣紳士具

呈貞孝節烈婦女三千一十八口捐貲建祠一案緣該節婦等性堅金石節凜冰霜或守義於終身或全貞於白首或未婚而殉烈或少寡而捐軀洵大節之無虧亦輿情之悉協既據該紳士等詳查志載確訪鄉評其未經請

旌之貞孝節烈各婦女共有三千一十八口皆係苦節奇行阨窮堪憫似應推廣

皇仁補請

旌表以勵風俗而慰貞魂第人數衆多未便分別建坊
請照總坊之例酌給銀三十兩令該紳士等於捐
建節孝祠外總建一坊以垂不朽出自

皇上天恩

臣

謹會同兩江總督

臣

琦善江蘇學政

臣

辛

從益合詞具

題伏乞

皇上聖鑒敕部核覆施行謹題請

旨

道光七年七月十八日奉

旨依議欽此

陶文毅公全集卷二十目錄

奏疏

科場

請復考試教習舊例摺子

會同江督陳奏耆紳重遇鹿鳴摺子

會同江督陳奏耆紳會榜重逢請與

恩榮筵宴摺子

耆紳會榜重逢請與

恩榮筵宴摺子

耆紳重遇鷹揚懇請與宴附片

奏疏

科場

請復考試教習舊例摺子

奏爲請復考試教習舊例以杜牽混而專訓課事竊
惟八旗各學教習向由禮部奏請

欽派閩卷大臣會同監試御史糊名扁試秉公甄錄投
考則有印結以防冒倩已取則加覆試以對筆蹟
所以重訓課而嚴弊混法至善也自嘉慶十七年
禮部議改於鄉會試落卷內挑取將考試教習之
例停止遂至辦理參差多有格礙伏查各學教習
之設原以教育八旗子弟非祇爲應試人員增一

出身之路也其間自不容有曠學之時從前考試多係留京諸生有志赴考是以一經取錄卽在部候缺至鄉會試挑取則揭曉未經中式紛紛回籍者多且有視爲小就而不願留或身病親老而不能留遇有缺出每至傳補無人一傳不到至於再傳再傳不到至於三傳三傳不到始傳其次應補之人而其人又或屢傳不到輾轉遷延經時厯月則八旗子弟之曠學者多矣而且挑取各卷多有已取教習謄錄及在各衙門行走之員禮部拆閱彌封時例應扣除如癸酉鄉試所挑教習五十名

經禮部扣除三十三名榜中填列者僅十七名期
閱三年人數難敷於是有越次傳補及別項借補
之事書吏得以從中作弊而物議亦自此滋矣竊
思禮部改考取教習之例於落卷挑取名曰防弊
實爲省事起見不知考試各有用處教習之與舉
人進士事不相侔豈宜省爲一場致滋牽混至若
防弊之法則凡考皆不能無弊不獨教習爲然司
事者宜因考而防弊不宜因弊而廢考况乎貢監
試卷向例祇戳印皿字號今因挑取教習不能以
援例之貢監充選又於卷面別印正字則冊籍旣

繁辨識尤易似於防弊之法反覺有疎也現距丙子鄉試之期尙遠人數無多將來又不免有越次傳補及別項借補之事恐滋弊混應請

旨飭復舊例仍行考取之法俾八旗官學不致懸缺待人各學生得以勤習功課於

國家教育八旗之典方爲有名有實臣管見所及伏乞

皇上訓示施行謹

奏

嘉慶二十一年正月二十九日具奏本日奉

硃批大學士軍機大臣英和劉鐸之會同該部議奏欽
此

會同江督陳奏耆紳重遇鹿鳴摺子

奏爲耆紳重遇鹿鳴懇

恩與宴以昭

盛典仰祈

聖鑒事竊據江蘇布政使梁章鉅詳稱原任兩廣總督
緣事革職嗣補兵部武選司主事吳熊光江蘇昭
文縣人現年七十九歲於乾隆三十三年由附貢
生中式戊子科順天鄉試舉人壬辰科會試挑取
中正榜引

見以內閣中書用在軍機章京上行走游陞通政司參議

嘉慶二年

恩加三品卿銜在軍機大臣上行走補放直隸布政使擢授河南巡撫湖廣總督八年三省教匪平定

賞太子少保銜調任直隸總督旋調兩廣總督十三年因暎咭喇兵船進口辦理不甚妥協革職發往伊犁効力十五年蒙

恩釋回奉

特旨以六部主事用補授兵部武選司主事請假回里修塋嗣因患病在籍調理今屆道光八年戊子科鄉試詎該員中式舉人之年正值花甲一周與重宴

鹿鳴之例相符懇請就近在本省與宴等情詳請具

奏前來臣等查吳熊光自弱冠登科之後久依

禁近歷任封圻嗣以獲咎因公復又邀

恩錄用此時耆齡在籍適當蕊榜重逢自應就近與宴鹿

鳴以耀科名而彰人瑞除咨明禮部外臣等謹會

同江蘇學政臣朱方增合詞恭摺具

奏伏乞

皇上聖鑒謹

奏

道光八年七月十三日奉到

硃批另有旨欽此同日奉到道光八年六月二十八日

內閣奉

上諭蔣攸銛等奏耆紳重遇鹿鳴懇與筵宴一摺原任
兵部主事吳熊光曾任督撫大員雖於兩廣總督任
內獲咎事尙因公此時養病在籍年近八旬適當慈
榜重逢洵屬藝林嘉瑞吳熊光著加恩賞給四品卿
銜准其重赴鹿鳴筵宴以昭盛典欽此

會同江督陳奏耆紳會榜重逢請與

恩榮筵宴摺子

奏爲耆紳會榜重逢請與

恩榮筵宴以光盛典仰祈

聖鑒事據江蘇布政使梁章鉅詳稱吳縣耆紳潘奕雋
現年八十九歲於乾隆三十四年己丑科會試中
式進士由內閣中書協辦侍讀典試貴州陞任戶
部貴州司主事嘉慶元年恭遇

覃恩以子世璜官

封翰林院編修二十五年以子世璜戶部主事加三級請

陶文毅公全集

卷二十

奏疏

六

四品

封典道光二年壬午科重赴鹿鳴宴經前撫

臣魏元煜

奏奉

上諭江蘇原任戶部主事潘奕雋年逾八秩再遇鄉科著加恩賞給員外郎銜以示朕嘉惠耆儒至意欽此在案茲屆來年己丑科會榜重逢請與

恩榮筵宴由縣府查明具詳請

奏前來

臣

等查潘奕雋志奮丁年名題甲榜班分浴

鳳曾持繡嶺之文衡秩晉祝鳩復荷木天之

寵誥疏廣清以養素宗親則令範交師伏生老尚談經

子姪則巍科繼起越廿八榜而簪花遠溯其羨靈
光植體之堅躋九十歲而瀛島重登益昭

壽考作人之盛前者萃筌載詠已邀紫紱之

恩施今茲杏蔭重輝請與紅綾之寵宴除咨明禮部外
謹合詞恭摺具

奏伏乞

皇上聖鑒謹

奏

道光九年二月初一日奉到

硃批另有旨欽此同日奉到道光九年正月十三日內

閣奉

上諭蔣攸銛等奏耆紳重與恩榮宴一摺江蘇原任戶部主事潘奕雋年躋九秩前於壬午科重遇鹿鳴賞給員外郎銜茲值己丑科會試蕊榜重逢洵屬藝林盛事著加恩賞加四品卿銜准其重赴恩榮筵宴以示朕嘉惠耆儒至意欽此

耆紳會榜重逢請與

恩榮筵宴摺子

奏爲耆紳會榜重逢懇

恩與宴以光

盛典仰祈

聖鑒事據江寧藩司趙盛奎詳稱寄籍江寧府上元縣

原任四川重慶府銅梁縣知縣貴逢甲現年八十

八歲係湖南常德府武陵縣民籍由監生中式乾

隆三十五年庚寅

恩科順天鄉試舉人壬辰

陶文毅公全集

卷二十

奏疏

八

恩科會試進士選授河南項城縣知縣引

見改授四川銅梁縣知縣歷署合州知州充丁酉科四川鄉試同考官告病回籍就醫江南嘉慶二十三年遵例入籍上元上年辛卯

恩科咨准重赴鹿鳴恭逢道光十二年壬辰

恩科會試計距中式進士之期已逾花甲重周例得重赴

恩榮筵宴循照已丑會試蘇州府在籍戶部主事潘奕雋重與筵宴之案詳請具

奏前來臣等查該原任四川重慶府銅梁縣知縣賈

逢甲午適八袞身歷

三朝雁塔名題早食紅綾之餅雷封化洽昔分青綬之符
濯來錦水芙蓉曾佐衡文於秋試開到公門桃李
又逢取士於春官詩賡鹿野之三昨歲已邀
曠典花轉鶯庭而百重來宜沐

殊恩所有耆紳重遇

恩榮懇請與宴緣由除咨明禮部外謹合詞恭摺具
奏伏乞

皇上聖鑒謹

奏

道光十二年二月初九日奉到

硃批另有旨欽此同日奉到道光十二年正月二十四

日內閣奉

上諭陶澍等奏耆紳重遇恩榮懇請與宴一摺江蘇原
任四川銅梁縣知縣貴逢甲年逾八袞會榜再逢洵
屬藝林盛事著加恩賞加知州銜准其重赴恩榮宴
以示朕嘉惠耆儒至意欽此

著紳重遇廬揚懇請與宴附片

再據江寧布政使詳稱原任浙江溫州鎮總兵李
景曾江南通州人現年八十五歲由乾隆辛卯科
武舉擢用南匯營都司洊歷山東登州遊擊浙江
玉環參將瑞安副將陞授溫州鎮總兵署理浙江
提督曾經前後在洋勦捕海匪受傷著勞經兵部
奏准給與功劄緣染溼疾懇准解任回籍調理上年
恭遇辛卯

恩科鄉試花甲一周例得邀准

奏請與宴據該員原籍地方官取造履歷冊結加結

轉詳請

奏前來

臣

查各省鄉試遇有武舉出身三品以上武

職無論現任在籍其中式科分適遇花甲已周應
重赴鷹揚宴者例准先期具

奏請

旨上年江南省辛卯

恩科武闈鄉試

奏准展至本年三月舉行今原任浙江溫州鎮總兵

李景會中式武舉科分已逾周甲之期欣逢

萬壽作人重開虎榜合與羣英共宴同赴鷹揚以獎耆

年而昭

曠典理合循例附片陳明請

旨伏乞

聖鑒謹

奏

道光十二年二月初九日奉到

硃批另有旨欽此同日奉到道光十二年正月二十四
日內閣奉

上諭陶澍等奏總兵重遇鷹揚請與筵宴等語原任浙
江溫州鎮總兵李景曾年逾八旬再逢鄉舉洵屬武

科盛事著加恩賞加頭品銜准其重赴騰揚筵宴以
獎耆年而昭茂典欽此